



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu 1 Dob Trinitatis, 14 JUNI**



Live streaming: www.gkpspadangbulan.com/tv
Tata Ibadah: <http://www.gkpspadangbulan.com/tatib>

1. Votum – Introitus – Tonggo

P. Riap ma hita jongjong.

Pasirsir hita ma dirinta laho marparsaoran pakon Jahowa!

Ibagas Goran ni Naibata Bapa pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen.

Balosi nasiam ma Jahowa marhasoman biar, anjaha summah nasiam ma nahei-Ni marhasoman hitir, ase ulang roh ringis-Ni gabe magou nasiam i tengah dalan, ai urah do gajag ringis-Ni. Martuah do sagala na marhatengeran Bani. **Haleluya, haleluya, haleluya.**

K. Haleluya, haleluya, haleluya (idodingkon)

P. Martonggo ma hita!

Ham Tuhan Naibata, Sitolusada, Naibata Bapa, Tuhan Jesus Kristus ampa Tonduy Na Pansing. Tarima kasih ma Bamu halani itompa, ipaluah janah ipapansing Ham do hanami marhitei idop ni uhur pakon holong ni atei-Mu na banggal in. Tuhan, patotap Ham ma malas ni uhur ampa haporsayaonnami. Pargogohi Ham ma hanami mandompakhon haganup na masa bani goluh on, ase tongtong hanami marhaporsayaon na toguh hu Bamu. Togu-togu Ham ma hanami ase maluah janah ondos hubani Jesus Kristus Anak-Mu in. Amen.

2. Mandoding 302. Puji Hita Naibatanta (1-3)

1. Puji hita Naibatanta, puji hita Anak-Niin,
Puji hita ge Tonduy-Ni Sitolu Sada do in
Haleluya, haleluya, Sitolu Sada do in

2. Puji hita Raja surga, Tuhan ni manis
Puji hita Raja 'Greja, bai ganup dunia on
Haleluya, haleluya, bai ganup dunia on

3. Haleluya isombahkon, na porsaya hu Bamu
Bai arian pakon borngin, idodingkon hu Bamu
Haleluya, haleluya, idodingkon hu Bamu

3. Hasasapan ni Dousa

P. Riap ma hita jongjong.

Martonggo ma hita, sopotkon hita ma dousanta hubani Tuhan Naibata!

Ham Tuhan Naibata, Bapanami na i nagori atas, paridop ni uhur mangidah hanami. Na roh do hanami jolma pardousa on hu lobei-Mu, mansopotkon dousanami na buei in. Hotop do hiranan hasoman, na mangarapkon pambahenan na madear humbannami. Gati homa do hanami lang parduli hubani hasoman janah gati hanami hurang sirsir manjalo pardearan humbani hasoman. Habasaron, halayakon pakon lubang ni uhur, gati lang jumpah bannami. Hurang sirsir mangarusi pingkiran ni hasoman, parsahap pakon pambahenannami gati paroh ringis ni hasoman, gati lang na madear ibahen hanami balos ni na lang madear na binahen ni hasoman dompak hanami. Hurang do hanami manonggohon hasomannami. Hurang ringgas do hanami mangapohi halak na ibagas pusok ni uhur, patoguhkon halak na ibagas hagalekon pakon pandoleian. Sonai age padannami dompak Ham gati do lang isuhuni hanami. Halani ai ma ase roh hanami mansopotkon dousanami. Maidop ma uhur-Mu, sasap Ham ma dousanami in. Pargogohi janah ajari Ham ma hanami mandalankon hata-Mu ibagas goluhnam. Ipangindo hanami on hu Bamu, ibagas goran ni Anak-Mu Jesus Kristus, Tuhan janah Sipaluah hanami. Amen.

Tanggar anjaha haporsayai hita ma Hata ni Naibata, bagah-bagah pasal hasasapan ni dousa.

Domma Hupasisi salahmu songon hambun, ajaha songon hambun na manorap dousamu. Mulak ma ho hu Bangku, ai Ahu do na manobus ho.

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

K : Amen

(hundul kuria)

4. Mandoding Hal. 214. Ale Jahowa Naibata (1-3)

1. Ale Jahowa Naibata, sai tatap hanai on,
ai dousa nami nabahat,
iboan hanai on. Holong ma Ham bannami on,
sai sasap dousa nami on,
Marhitei Jesus Anak in, na matei bani silang In,
i Golgata i dolog golgata.

2. O Jesus, haholongan in, sai tatap hanai on,
Ai ham do hatundalan in, jagai Ham hanai on.
Sai ulang magou on ganup, tinobus-Mu do haganup.
Taluhon Ham sibolis in, ai nabajan do akal nin;
Pagoluh Ham, hanami on romban.

3. Ale Tonduy Napansing in, sai tatap hanai on,
Sai suan Ham holong-Mu in, bai uhur nami on;
Pasada uhur nami bei, ampakon tonduy nami pe,
Lao mangirikkon ojur-Mu, mangkasiholi sondang-Mu
Parholong in, pardear layak in.

5. Hata Haporsayaon

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak
na porsaya bani sab tanoh on!

P+J. Ahu porsaya bani Naibata Bapa.....Amen! *(hundul kuria)*

6. Mandoding 334. Anggo sai Holosohan Ham (1-3)

1. Anggo sai holosohan ham bai goluh on
Pala ham mandolei lang tuk gogohmu
Ingat pasu-pasuni Tuhanta in,
janah paruhurhon pambaenan-Ni in

Ref. Ulang lupa bai layak-Ni in,
ganup ari sai bilangi in
Sai bilangi pambaenan-Ni in,
in ma pasu-pasu ni Tuhanta in.

3. Anggo ikawahkon ham na bayak in
na gok arta duit pakon omas in
Ingat ham ma arta sijengesan in,
sijaloonmu use i surga in
Ref. Ulang lupa bai layak-Ni in,
ganup ari sai bilangi in
Sai bilangi pambaenan-Ni in,
in ma pasu-pasu ni Tuhanta in.

4. 'Ge bai parlajouan hasunsahan pe
roh do Tuhan paluahkon hita bei
Dingat ma ganup dear layak-Ni in
na mangkasomani ham bai goluhmin
Ref. Ulang lupa bai layak-Ni in,
ganup ari sai bilangi in
Sai bilangi pambaenan-Ni in,
in ma pasu-pasu ni Tuhanta in.

7. Ambilan: Lukas 12: 13-21 (Pdt. Dr. Paul Ulrich Munthe)

8. Manggalang: (Roh ma na patumpuhon galangan hu lobei.)

P. Paima ipatumpu hita galanganta, tangar hita ma lobei Hata ni Naibata na
gabe onjolan banta laho manggalang, aima na tarsurat bani:

Psalmen 50:23 "Ise na manggalangkon banggal ni uhur, ai do na
pasangapkon Ahu, anjaha ise na mardalan ibagas hapintoron, hubani do
patalaron-Ku hatuahon-Ku." Sonari patupu hita ma galanganta.

GALANGAN
(Cipt. Pdt. Ito Belihar Purba)

ROH HITTA SONARI HU LOBEI NI TUHANTA
LAHO MANGGALANG, GALANGAN MALAS UHUR
DEAR ONDOSHON HAM BANI MALAS NI UHUR
MARTARIMA KASIH HU LOBEI-LOBEI NI
AI PASU-PASU NI BUEI TUMANG IJALO HITTA ALE...

TONG DINGAT MA HITTA GANUPAN NA DONG BANTA
RONSI GOLUHTA PASU-PASU NI TUHAN
AI IDOP NI UHUR NI DO MANOBUS HITTA
BAI HAYU PARSILANG NA GABE GALANGAN
SAI DINGAT MA HITTA BANI HOLONG NI TUHAN IN ALE...

REFF:

PARSAHAP NA PANTUN IN DO NA GABE GALANGAN TA
PARLAHOU NA TALUP SONAI PANGABAK SIPUJION
GOLUH NA ONDOS IN DO GALANGAN NA MAHARGA
DEAR MA BOAN HITTA IN BAI TUHAN NAIBATANTA

ON MA GALANGAN NAMI...

ONDOS MA BAMU..

RAP AMPAKON GOLUH NAMI..

ONDOS MA BAMU...

9. Tonggo Galangan – Panutup – Pasu-pasu:

P. Riap ma hita jongjong.

Martonggo ma hita mangondoskon galanganta hubani Naibata!

Ham Tuhan Naibata, Bapanami, pardear layak janah na unjah hu bannami. Tarima kasih ma hatahononnamni hu Bamu, halani tongtong do ipasu-pasu Ham goluhnamni. Domma ihasomani Ham hanami janah ipasu-pasu Ham horjanami das hubani sadari on. Sonari, ibagas malas ni uhur roh do hanami mangondoskon buah ni horja na dob pinasu-pasu-Mu in gabe galangan

hatarimakasihon pakon puji-pujiannami hu Bamu. On pe sai jalo Ham ma galangannami on, bahen hasangapon ni goran-Mu janah mambahen lambin marhataridahan harajaOn-Mu i dunia on. Ibagas goran ni Anak-Mu, Jesus Kristus Tuhannami, jalo Ham ma tonggonami on. Amen.

K. (Mandongkon doding galangan-Haleluya No. 5:4)

Bamu sadokah ni dokahni, au on o Jesus Tuhankin;

Ham ma 'lah haganup ompungni, gogohku pakon artangkin;

Ai iberehon Ham daroh-Mu, manggalar utang ni dousangku

P. Ham Tuhan Naibata Bapa, Anak pakon Tonduy Na Pansing. Ipuji janah ipasangap hanami do Ham halani panramotion-Mu bani kuria-Mu i dunia on. Marmalas ni do hanami halani domma pataridahkon Ham hadirion pakon idop ni uhur-Mu bannami. Ham do namanompa, mambere hasasapan, pakon mambobai sagala na porsaya hu Bamu mardalan hu hagoluhan sisadokah ni dokahni. Halani ai mangelek ma hanami hu Bamu, tompa janah pabayu Ham ma hanami marhitei kuasa ni Tonduy-Mu in, ase tubuh hanami paduahalihon, janah totap margogoh laho mangkagoluhkon holong ni atei-Mu na dob ondos bannami. Urupi Ham ma hanami na dob tongon-tongon hanami gabe anak-Mu. Balosi Ham ma hanami ibagas idop pakon holong ni atei-Mu. Amen.

P. Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnamni bani dousa ni hasoman na mardousa dampak hanami, Ulang hanami bobai Ham hu parlajouan. Paluah Ham ma hanami humbani pangangou!

K. Ai ham do simada harajaon, pakon hagogohon, ampa hasangapon, sadokah ni dokahni. Amen. (Idondingkon)

P. Ambilankon hanima ma Ambilan Na Madear in sagala na na tinompa.

Jalo hita ma pasu-pasu humbani Tuhan Naibatanta:

Jalo ham (hita) ma pasu-pasu humbani Tuhan Naibatanta Ipasu-pasu anjaha iparorot Tuhan Naibata ma Ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakhon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduymu (tonduyta bei) Amen

K . Amen, Amen, Amen! (Idondingkon)